

張文襄公奏議

張文襄公全集卷五十八

奏議五十八

到兩江署任謝恩摺

光緒二十八年十月十一日

竊臣奉旨署理兩江總督當經具摺謝恩並奏報自鄂起程日期各在案嗣於十月初六日馳抵江甯初九日准護理兩江總督江甯布政使臣李有棻派委署江甯府知府朱其昌署中軍副將丁華容將兩江總督關防兩淮鹽政印信欽差通商大臣關防並王命旗牌暨文卷等件賫送前來臣當卽恭設香案望闕叩頭謝恩祇領任事伏念臣驚駘下乘蒲柳衰姿權篆甫閱七年時

艱更加十倍臣惟有修明內治慎重外交博訪賢才務其遠大江南繁劇以獎拔廉儉之吏爲先新政多端以造就文武人材爲急霜筠雪竹愧鍾山投老之無能青瑣滄江增京國朝班之依戀謹當隨時與北洋大臣江蘇江西安徽各撫臣暨漕臣和衷商辦認真整頓以仰答高厚鴻慈於萬一

硃批知道了欽此

裁停舊式兵船積存薪餉另造快船摺

光緒二十八年十二月十二

月十三日

竊照兵艦爲江防大政擴充整頓尤爲今日要圖然無

用之船雖有若無若欲訂造新式兵船籌款又甚不易
必應急籌良法以顧江防查南洋現有兵輪五號曰寶
泰曰鏡清曰南瑞曰南琛曰保民運船三號曰威靖曰
登瀛洲曰鈞和蚊船四號曰龍驤曰虎威曰飛霆曰策
電皆係購造多年機老鋼薄式舊行遲蚊船一項短笨
濡滯尤不適用此等師船既不足爲外海制勝之資并
不足爲長江守險之用外國兵輪往來長江者甚多見
之徒爲竊笑而薪餉煤油及修理各費歲糜巨款實爲
可惜若不及早改絃更張以後永無振興之望經臣督
同籌防局司道詳加商酌除寶泰鏡清兩兵輪威靖登

瀛洲兩運船機輪較勝應仍留用以備巡緝外其南瑞
南琛保民三兵輪龍驤虎威飛霆策電四蚊船擬卽一
律裁停鈞和一輪本係上海商捐作護商之用仍發還
令商人自養此外備差小輪察其無用者亦酌量裁撤
約計所停各船合薪糧煤油修理雜費歲可節存銀二
十萬兩由籌防局專款存儲無論何事不得擅動以十
年計之可得銀二百萬兩卽此款另向外洋有名船
廠定造長江淺水新式快船數艘大約裁停廢船七艘
可購合用新船六七艘限於三年內造齊並訂明分年
付價以免另籌鉅款兩年半之後卽有新式兵船可資

長江巡防之用至裁停舊船令其酌量變價湊備新船經費以免看守虛糜似此化無用爲有用於籌防之道較有實際

硃批著照所請該部知道欽此

保薦經濟特科人才摺

并清單

光緒二十八年十二月十五日

竊照光緒二十七年四月十七日欽奉 慈禧端佑康

頤昭豫莊誠壽恭欽獻崇熙皇太后懿旨爲政之道首在得人况值時局阡危尤應破格求才以資治理允宜敬遵成憲照博學鴻詞科例開經濟特科於本屆會試前舉行天下之廣何患無才其有志慮忠純規模閎遠

學聞深通洞達中外時務者著各部院堂官及各省督撫學政出具考語卽行保薦並著政務處大臣擬定考試章程請旨辦理等因欽此又於六月初四日奉上諭著各督撫學政於保送時虛心采訪果係物望素孚確有實學者方准保奏等因欽此仰見朝廷破格掄才務求實用之至意莫名欽感臣惟特科之設其典至隆經濟之名其選尤重必其人品行修飭學有專長方足以仰副旁求之盛典臣前於湖廣總督本任內業經會同湖北撫臣端方就鄂中人才慎選品學兼優之士十六人具摺保奏在案茲臣調署兩江復就大江南北博訪

周諮詳加甄采並就平日真知灼見者共選得三十人
皆屬品端志遠學有專長深明時局才堪致用謹就其
生平學行出具切實考語另繕清單恭呈御覽敬備聖
明采錄

謹將保送經濟特科各員出具切實考語敬繕清單恭
呈御覽

翰林院編修繆荃孫江蘇江陰縣人

學問博雅識趣端凝講求時務不涉輕浮其人品堅
定不染時俗躁競之習尤爲可貴

翰林院修撰張謇江蘇通州人

學問富瞻才力開張講求東西各國政治教育各門學術均能心知其意辦事切實精密洵爲致用之才記名御史戶部郎中劉奉璋江蘇寶應縣人

夙承家學經術深通於時務亦極留心識議平正考求外國學校情形得其要領

候選郎中李維格江蘇吳縣人

品格安詳立志篤學前曾遊學英國兼通英法兩國語言文字隨使美國日本熟諳交涉近年考求治鍊製造之學成效卓然

候選內閣中書曹元忠江蘇吳縣人

經學詞章兼長並擅考求時務通達和平

候選內閣中書徐振濟江蘇無錫縣人

講求格致製造之學出自家傳具有心得

山西甯遠府通判現署太原府知府吳廷燮江蘇江甯縣人

才具開展學識優長羣經諸史博涉多通於古今政治輿地諸學能得會通國朝掌故律令及近時交涉約章均所諳習

候選同知張煥綸江蘇上海縣人

覃研經史識達品端購求經世之學志切有爲

引之集卷之五 五
候選通判舉人王季烈江蘇長洲縣人

好學深思博聞強識於中西算學物理化學研習精勤具有心得

江浦縣訓導優貢陳慶年江蘇丹徒縣人

才識開通學問淹博於古今中西戰事兵略研求探討貫串無遺洵爲傑出之才

拔貢華世芳江蘇無錫縣人

文行兼修精於算學

布政使司理問職銜賈文浩江蘇南匯縣人
熟於中外天文之學殫心測驗雅擅專長

江蘇候補道蒯光典安徽合肥縣人

中學素稱博雅西學亦甚賅通兼以才氣俊爽治事
精能果能盡其所長必能有裨時局

翰林院編修劉廷琛江西德化縣人

文學優長識力堅定深明時務獨見先機此才實不
多觀

翰林院編修沈曾桐浙江嘉興縣人

中學素優兼通西學器局恢闊思精識敏幹濟之才
翰林院庶吉士陳驥直隸天津縣人

品謹學優深通化學確能徵諸實驗尤爲中國儒者

所難能

刑部主事孫詒讓浙江瑞安縣人

羣經諸子靡不研精淹雅閎深著書甚富久負士林宿望近年講求時務實能會通中西古今學術治術刑部主事李希聖湖南湘鄉縣人

熟於古今史學講求時務經濟持論明通才力強毅刑部主事華學洊直隸天津縣人

才長思敏銳意研精深通理化之學

候選光祿寺署正羅振玉浙江上虞縣人

學問優長近年究心中外農學及教育學廣爲蒐采

選輯流傳深裨世用確係有用之才

三品銜候選道魏瀚福建侯官縣人

品端識正學有專長前由福建船政學生出身遊學英法德三國諳習英法兩國語言文字精於海軍製造之學中國罕觀之才

安徽候補知府王詠霓浙江黃巖縣人

學博文優究心時務前曾充出使大臣隨員遊歷歐洲殫心考究

同知銜候選知縣鄒代鈞湖南新化縣人

敦品力學才具優長前曾遊歷歐洲於中外輿地之

學考求精熟繪有全圖當世實罕其匹

舉人汪鸞翔廣西桂林縣人

和平愼默志節清廉於格致理化之學覃精研思多有冥悟

舉人陳衍福建閩縣人

學富才長議論通達究心時務於古今中外政治之學持之有故言之成理

拔貢姚炳奎湖南邵陽縣人

學術純正博通地理之學辦事切實可信

廩貢生馬貞榆廣東順德縣人

人品端方學術純正研精春秋左氏之學足以鍼砭
近世文人依託公羊發爲謬說之病既有功於經學
尤有功於世道人心

廩生左全孝湖南清泉縣人

人品方正志慮忠純經史博通才長經濟於古今史
事中外輿地算學均所研習前曾遊歷日本考求教
育理法具能觀其會通洵爲體用兼備之才可任大
事

羅照滄廣東南海縣人

行端志正思密學精於測算繪圖之學辨晰微芒絲

絲入寇洵屬詣力過人成就人才甚眾

湯金鑄廣東花縣人

才力精強性情勤篤古今中外疇人之學爛熟於胸
善於教人後進經其指授者開通最易成材極多

整頓淮鹽積弊摺

光緒二十八年十二月十六日

竊維淮鹽規制前督臣曾國藩釐訂於前沈葆楨補苴
於後一時頗有成效可紀奉行日久精義漸漓至今日
而岌岌不可終日矣北鹽引地無多故祇設正陽關一
督銷南鹽引地較廣故設湘鄂西皖四岸督銷而以儀
棧爲總匯但觀正陽銷鹽之數儀棧出鹽之數卽可得

鹽務衰旺之大凡正陽自光緒二十七年六月起至本年五月底止頗爲振作約符光緒初年全盛之數六月以後又日漸滯銷儀棧今年出鹽之數不足四十萬引若不及時整頓一二年內鹽務卽不堪設想課餉六百數十萬於何取之時人論鹽務者或倡爲就場徵稅及化場運爲公司諸法雖費盡籌維然皆非倉猝所能辦且非銷數稍暢商困稍蘇亦無以取信於人目前整頓之策無他惟在緝私剔弊兩大端而已長江上下游之私分長水短水兩種而以所謂長水爲最甚短水由場偷運至江口分售前經該運司另募勇丁兩營分駐各

場巡緝長水則尤爲橫悍卽將自場偷運之鹽逸出鎮江北岸上下游各口至大通一帶侵佔官銷約計江程五六百里聯船十百備購槍械與匪無異沿途關卡或莫敢誰何或得規包庇以致滋蔓難圖此項梟船堅固便利行駛每乘黑夜風大之時舊有緝私舢板不能得力不能江心寄碇必須收港一也艙面太窄雖配新式礮位不能旋轉二也風帆較小行駛不如梟船之速三也船身太輕風浪大作不能行駛四也且此項梟匪充塞長江爲數何止數萬近年黨羽愈多猛悍愈甚若不早爲之計設法捕擊解散寢假與紅青二幫會票各匪

連成一氣將爲江南大患不止有害鹽務已也臣與運司程儀洛熟加籌計欲戢梟風非添用輪船不可查金焦爲第一重門戶茲專派運船登瀛洲一艘扼駐焦山以下該輪礮力較大可以震懾大幫梟船又於所裁小輪以三號發交運司以一號駐瓜洲口緝私以一號駐沙漫洲緝私均歸儀棧道員節制調遣責令管帶之員住船梭巡以一號駐大通緝私歸大通督銷局節制調遣此三小輪統歸運司統轄考核其養船經費卽由各該局鹽務自籌惟此項緝私輪船無異行軍不能斷火需費頗鉅難以多用應另造帆船二十號略仿海關巡

船之式配齊新式精槍利礮統歸運司儀棧節制將沙漫洲緝私道員裁去另飭總辦儀棧之道員遴選員弁自行委用以收實效而免掣肘另由運司自備小輪兩隻專司稽察各私梟船來往蹤跡及商船船戶有無夾私自瓜洲口一帶起至蕪湖止常川梭巡其大通督銷局之小輪與沙漫洲儀棧所轄之小輪亦責令時時會哨庶蕪湖以下焦山以上鹽價較賤之地可望漸次肅清運鹽船戶亦不敢沿途買私夾帶取巧蓋緝私以長江爲腹心內地小河陸路爲枝葉故先杜長江大幫之私再清內地水陸偷越之私腹心保全則雖枝葉未淨

尙無大礙其帆船開辦經費由儀棧向解支應局雜款
籌撥其帆船常年經費現擬裁去沙漫洲緝私舢板十
隻再酌裁督標水師左營舢板十隻督標水師前營舢
板十隻約略可以相抵所用兵輪小輪常年經費除運
船登瀛洲本由籌防局開支外其餘概由鹽務自行籌
措所謂增兵船以制梟者此也鹽務積弊叢生亦非一
端而以近年各掣驗卡爲最駭人聞聽之事並不掣驗
勒索規費每票或多至提鹽數十包索洋銀數十元疊
據商控司詳在案其中苦累情形各商言之痛心疾首
深爲可閔索費納規旣多於是船戶不能不夾私充斥

因爲岸銷致滯之一大端誤國病民莫此爲甚前督臣劉坤一議裁未果現又據運司詳請裁撤前來查下關掣驗爲四岸總掣驗卡積弊素深從前曾充該卡委員者每年盈餘或二三萬金或五六萬金最駭物聽掣驗卡既專以索規爲事而置掣驗於不問商人於是專以夾私爲事陋規年增一年則船私日多一日事無足怪但此卡不能裁撤現辦該卡之道員趙有倫潔己自愛商民悅服遠近交稱自可毋庸裁撤其大通武穴湖口三掣驗卡有弊無利應卽查照運司所議悉行裁撤以後各岸嚴加比較各專責成只可令各督銷局自行派

員掣驗斷不可再派大員不相節制致滋流弊至下關
掣驗光緒二十四年江蘇節省盈餘案內下關卡歲提
銀五千兩今既責該卡以除弊恤商不索商規該卡員
趙有倫實能潔己奉公此項應提盈餘銀五千兩應予
豁免又大通掣驗卡歲提盈餘銀三千兩武穴掣驗卡
歲提盈餘銀二千兩三卡共應提銀一萬兩各卡既裁
則盈餘無著已由臣飭運司另行籌款撥補札飭藩司
立案所謂別卡弊以恤商者此也其餘如各岸鄰私應
由各岸各專責成而下河運河橫溢之私泰壩蔣壩等
處盤越之私爲數不少防不勝防緝不勝緝然必須漸

束漸緊不使侵灌長江應由臣督飭運司等詳爲設法
各督銷積弊不一而如積壓商本捏報淹消吞蝕緝費
雜款以致鄰私充斥諸務廢弛之類必須先爲剷除亦
由臣飭司詳議期於一掃而空以後再查照前督臣沈
葆楨舊案清查鹽堆整頓鹽色以恤竈艱以利銷市臣
屢飭司道等會議又旁采商情皆以爲如此辦法可以
日有起色抑臣更有請者立法貴在扼要行政尤在得
人鹽務差使皆關緊要其中如儀棧爲南鹽之總匯正
陽爲北鹽之歸墟下關爲四岸之總掣驗稍不得人大
局立見搖動北鹽尤非南鹽可比正陽放私無人控制

一經貽誤補救爲難從前鹽務差使並無年限近年來改爲兩年期滿又改爲一年期滿不以爲籌餉要政而以爲調劑優差有功者不必賞有過者不必罰潔己者循例報滿作弊者安然無恙以致人懷苟且鹺綱大局日見頹敝試思鹽爲日用必需之物孳生愈多銷數自應愈暢何以十年之內反不如前其故不問可知故整頓南鹽四岸督銷局及北鹽正陽督銷局五河鹽釐局尤爲剔積弊之大宗杜賣私之原本此六局均號爲膏腴若不爲事擇人而但爲人擇差則鹽務永無振起之日現飭司詳議章程嚴加比較勒限責效有效者不但

留差且奏請優獎無效者輕則停委記過重則奏參庶人人知所勸勉各顧考成而鹽務不致敗壞矣

硃批著照所請督飭運司認真整頓以除積弊而裕餉源欽此

派蒯光典管理儀棧片

光緒二十八年十二月十六日

再整頓淮鹺認真緝私掃除數十年之錮弊非得廉明幹練之員畀以事權寬其歲月不足以收實效查有二品頂戴江蘇補用道蒯光典力果心精兼任勞怨整躬率物眾望交孚上年夏間前督臣劉坤一札委該道辦理淮北督銷局實心整頓將正陽關從前一切偷情貪

焚之蠱毒一掃而空剔弊疏銷卓有成效甫及一年售
銷北鹽至一百數十萬包之多爲二十年來所僅見現
經臣檄委該道管理儀徵淮鹽總棧責以釐定新章刻
除宿弊該道念兩淮鹽務歲收釐課及新舊加價各案
多至六百數十萬兩爲國家餉源大宗身任鉅艱絕無
推諉實爲江南辦理鹽務第一出色之員惟旣畀以事
權尤必寬其歲月儀徵淮鹽總棧關繫湘西皖鄂南甯
全局現在新案償款歲派兩淮鹽務一百二十萬兩數
鉅期迫必於儀徵棧南鹽總匯之區扼要廓清江面各
路梟私岸銷始有起色必須久於其事方能從容展布

茲擬明定章程儀棧一差如淮銷短絀自應隨時撤換如辦理有效應令久任此差以資熟手至少以三年爲期不得隨時更易如三年以內淮銷大暢成效昭彰有裨江省理財大局應准奏懇天恩破格甄敘以資鼓勵硃批著照所請戶部知道欽此

額請陞見摺

光緒二十九年正月初八日

竊臣曩官侍從洊歷封圻僅於光緒十年在山西巡撫任內奉旨陞見獲覲天顏旋蒙恩簡任兩廣總督及量移湖廣總督奉旨勿庸來京請訓光緒二十年九月二十四年閏三月兩次奉旨陞見始以改署兩江中止續

以行至上海奉旨折回二十七年八月恭值六飛廻馭
籲懇赴汴迎駕又未仰邀俞允是年十二月十一日奉
到電旨欽奉懿旨劉坤一著於明年開河時卽行來京
陛見張之洞著俟劉坤一回任後來京陛見等因欽此
嗣又奉十五日電旨欽奉懿旨著俟商約定議後再行
來京陛見欽此翹望京華又更歲籥葵藿積悃彌切依
馳茲查兩江督臣魏光燾正二月之交定可履任臣擬
交卸署篆後及茲暇日束裝北上展覲天顏稍紓廿年
戀闕之忱而近來議訂商約情形及奉旨籌辦興學練
兵諸要政亦得以詳晰面陳恭聆聖訓俾有遵循合無

仰懇天恩允准不勝瞻戀屏營之至

硃批著來見欽此

創建三江師範學堂摺

光緒二十九年正月初八日

竊照江甯省城遵旨改設高等學堂及府縣中小學堂各一所業經前督臣劉坤一護督臣李有棻將籌辦情形先後奏陳在案惟學堂一事體大思精其中等級繁多而次第秩然不可紊越必須扼要探源方有下手之處查各國中小學堂教員咸取材於師範學堂是師範學堂爲教育造端之地關繫尤爲重要兩江總督兼轄江蘇安徽江西三省此三省各府州縣應設中小學堂

爲數浩繁需用教員何可勝計若未經肄業師範學堂
延訪外國良師研究教育之理講求教授之法及管理
之法遽任以中小學堂教員必致疎漏凌躐枝節補救
徒勞鮮功且詳略參差各學堂學派學程終難畫一經
臣督同司道詳加籌度惟有專力大舉先辦一大師範
學堂以爲學務全局之綱領則目前之致力甚約而日
後之發生甚廣茲於江甯省城北極閣前勘定地址創
建三江師範學堂一所凡江蘇安徽江西三省士人皆
得入堂受學查直隸督臣袁世凱奏建師範學堂定全
省學額爲八百名延聘日本師範教習十二人茲爲三

省豫儲師範學額自宜酌量從寬現擬江蘇省甯屬定額二百五十名蘇屬定額二百五十名安徽省定額二百名江西省定額二百名共定額爲九百名其附屬小學堂一所定學額爲二百名所有師範生及附屬小學生均由地方官出具印結取具本生族鄰甘結保送考選入學開學第一年先招師範生六百名三年後再行續招足額前三年教小學堂之師範生約分三級爲一年速成科二年速成科三年本科以便陸續派赴各州縣充小學堂教員第四年卽派置高等師範本科精研教育學理以教中學之師範生備各屬中學堂教員之

選現已延聘日本高等師範教習十二人專司講授教
育學及理化學圖畫學各科並選派舉貢廩增出身之
中學教習五十人分授修身歷史地理文學算學體操
各科學堂未造成以前暫借公所地方於本年先行開
辦練習教員之法令東教習就華教習學中國語文及
中國經學華教習就東教習學日本語文及理化學圖
畫學彼此名爲學友東教習不得視華教習爲弟子在
日本語此法名爲互換知識俟一年後學堂造成中國
教習於東文東語理化圖畫等學通知大略東教習亦
能參用華語以教授諸生於問答無虞扞格再行考選

師範生入堂開學則不必盡借繙譯傳達可免虛費時
刻誤會語氣諸弊收效尤速其購地建堂經費已據江
甯藩司籌撥應用其常年學堂經費如華洋教習各學
生飯食冬夏講堂及操場衣冠鞋帶卧具紙筆燈火獎
賞監督提調監學庶務各委員司事人役薪工及一切
雜用之屬每年需款甚鉅已議定由江蘇藩司於本年
先協撥銀一萬兩以後每年協籌銀四萬餘兩擬令安
徽江西兩省各按學生額數每名年協助龍銀一百元
不過稍資津貼不敷尙多所有全堂三省學生學費自
應專籌的款濟用查江甯銀元局鑄造銅元最爲便民

要政行銷頗暢甚有盈餘現已由該司詳請添購機器
增建廩屋大加擴充卽以歲獲盈餘專供該學堂經費
之用此舉爲三省學堂根本教員得人起見雖江南財
力支絀不敢不設法籌措勉爲其難至學堂建造規模
及一切課程辦法經臣專調會赴日本考察學校熟悉
教育情形之湖北師範學堂長來甯精繪圖式詳定章
程總期學制悉臻完備合法並於省城設立兩江學務
處所派委司道等員會同綜理加意講求督催興辦以
仰副聖朝興教勸學造就人材之至意

硃批管學大臣議奏欽此

責成運司稽察各督銷道員片

光緒二十九年正月二十七日

再臣上年十二月間以淮鹽疲弊關係餉款大宗必宜急籌整頓擬增設緝私輪帆各船裁撤大通武穴湖口掣驗三卡暨沙漫洲緝私道員久任總辦儀棧之員以期恤商除弊扼要緝私業經分籌辦法具奏奉硃批著照所請督飭運司認真整頓以除積弊而裕餉源欽此當經恭錄分行欽遵在案查淮鹽釐課每年六百數十萬新案賠款及舊案洋債京甘各要餉皆取給於此近來鹽務各員大率皆營私害公賢者十不獲一貪風日著銷數日虧私梟日熾商人日困淮綱大局殆將不支

自運司程儀洛到任後廉介率屬竭力整頓不避嫌怨
各員稍有忌憚現正籌辦大舉緝私除弊恤商諸事該
運司事事專顧公家破除情面實爲冠絕一時該運司
現升授廣東臬司於淮綱盈絀關係極鉅幸蒙天恩將
程儀洛暫行留署運司一年仰見聖明鑒照整頓淮綱
此後自當益責成該運司認真整理以期宿弊一空維
持餉款惟查運司爲權鹽之總匯實爲各員之綱領必
須凡辦鹽務者之賢否皆歸其稽察考核認真舉劾庶
各員知有畏憚其賢者得益勉爲其難中材以下亦不
敢公然作弊鹽務方能振興查向來各岸督銷鹽釐掣

驗各局卡從前督臣曾國藩沈葆楨在任時所委不拘官階道府同通州縣皆有近數十年來專委道員其官階與運司相等不相統攝委辦各員旣以得鹽務差使爲調劑更視一年期滿如傳舍任意舞弊肥私以去其中飽私囊之鉅實屬駭人聽聞歷來運司因無糾察之責誰復肯爲開罪同僚之舉離綱之壞實由於此今幸運司程儀洛廉潔有爲持正不阿不肯徇情見好然使事權不專爲人牽制則鹽務仍日就隳壞而不可救現在力籌整頓之際似宜重運司以考察之權查候補道員到省年滿甄別向由藩臬兩司出具考語至三年大

計實任道員藩臬兩司亦均加考是實缺道員既可由
兩司考核則候補道員亦即可由運司考核情事正同
矧各道係協助運司辦理鹽務其事仍爲運司之事其
爲人之優劣公事之功過斷無使運司不得預聞之理
擬請嗣後委辦鄂湘西皖四岸督銷局正陽督銷局淮
北四食岸督銷局五河鹽釐局儀徵淮鹽總棧下關掣
驗卡以上十差各道員均由運司隨時認真稽察每年
出具切實考語分別優劣據實詳報由督臣覆加查考
其賢而有效者或予留差或奏請優獎無效者輕則停
委記過重則奏參如運司舉劾不實並將運司參處如

此辦理雖畀運司以事權實更重其考成以後各局道員有不發覺之弊端運司不得辭徇庇之咎庶在事各員懷然知勉鹽務得有起色

硃批著照所請該部知道欽此

請開復顧家相原官摺

光緒二十九年正月二十七日

竊臣等准督辦鐵路總公司大臣盛宣懷咨稱三品銜指分河南試用知府前代理江西萍鄉縣事調補清江縣知縣顧家相以境內出有採生折割之案經前江西巡撫李興銳奏叅革職勒緝該員顧家相上年暫行代理萍鄉縣事到任未久適有匪徒採生折割之案旋經

拏獲正法民間疑爲鑛局指使牽涉洋人勢甚可危時顧家相已將交卸鑛局委員電請轉電江西巡撫仍留該員一手辦結該員防護彈壓得保無事而李興銳以電報中有新舊交替五日京兆事更棘手之語疑爲顧家相緝捕不力附片奏叅革職查前次勘辦萍鄉煤鑛及建造鑛路鐵軌輿情疑懼梗阻賴顧家相在萍鄉本任開導鄉民多方調護始獲就緒成效昭然今反因此獲咎殊堪憫惜可否奏請開復原叅處分等情咨商前來當查接管卷內前江西撫臣李興銳以萍鄉縣境有何鄧二姓童子被匪採生折割旋拏獲匪犯洪信誠訊

明正法境內謠傳指爲鑛局官錢號所爲并疑及洋人事機萬分危急該縣顧家相疎於防範辦理又多未善現已委員接署應請將顧家相革職仍勒令留縣協緝等情會同前督臣劉坤一奏叅在案臣等密加查訪緣江西萍鄉僻處腹地接壤湖南風氣未開臣之洞前在湖廣總督任內迭次委員協同洋鑛師往勘該縣鑛務民間初甚驚疑無從著手經該縣顧家相設法勸諭彈壓始得勘辦開廠及盛宣懷接辦以後派洋鑛師常川駐縣由鑛所興造水口鐵路又由萍鄉接修至醴陵縣該處紳民託爲創見迭起阻撓均經顧家相會同委員

委曲調護剛柔并用始將設局購地造路等事次第告成輿論亦皆翕服是以前撫臣松壽特以該員才堪治劇調補清江縣要缺并經鄰境之湖南撫臣俞廉三保薦人才奉旨交吏部帶領引見則其平日之才具可以概見此次該員業已交卸萍鄉縣事請咨赴部因本任知縣出缺後任未到復令前任暫行代理到任未久適遇採生折割之案旋將匪犯洪信誠拏獲正法當時謠言遽起人心浮動該令交卸在即猶能極力鎮懾消弭無事祇以盛宣懷電咨江西撫臣有五日京兆事更棘手之語詞意未能明晰致李興銳疑其不能得力又以

事關鑛務語涉洋人當外患內訌之時恐致別生枝節
思有以鎮定人心遂將該員叅劾亦出於一時權宜之
計此該員顧家相前辦鑛路確著成效及因案誤會被
劾之實在情形也伏查近年因案叅劾州縣續經查明
被叅冤抑才有可用均卽立予開復如山西知縣恩順
孔繁潔江西知縣應衷等有案可稽仰見朝廷愛惜人
才不存成見今該員顧家相官聲政績屢邀保薦辦理
鑛路尤資得力乃反以影響之訛言牽涉鑛局被劾其
才實屬可惜此次暫往代理甫經到任未屆初叅之限
處分本應從輕且匪犯業已拏辦事後維持並無貽誤

卽有潛逃餘犯例歸後任接緝其情尤屬可原旣准盛
宣懷咨商奏請開復自係深悔當日致函急率措詞未
酌之誤自應爲之申雪以昭公允臣等往返電商意見
相同合無仰懇天恩准將三品銜指分河南試用知府
前代理江西萍鄉縣事調補清江縣知縣顧家相開復
原官升階原銜免其留緝仍遵旨送部引見出自逾格
鴻慈臣等謹合詞恭摺具奏伏祈聖鑒
硃批著照所請該部知道欽此

張文襄公全集卷五十八終

新城王樹樸校

張文襄公全集卷五十九

奏議五十九

查明劉坤一戰功政蹟摺

光緒二十九年二月初二日

竊照前督臣劉坤一因病出缺欽奉懿旨賜卹并將生平事蹟宣付史館等因欽此仰見朝廷表彰忠藎恩禮有加莫名欽感遵查該故督臣劉坤一以諸生起家軍旅當道光咸豐之間湘粵之交羣盜如毛新甯土匪李沅發糾黨陷城戕官該故督臣與前雲貴督臣劉長佑赴寶慶府請兵收復縣城前安徽撫臣江忠源探奇其才嘗欲招致軍中以該故督臣事父至孝親老不忍遠

離而止咸豐五年丁父憂聞粵逆逼近縣治攜家遠避適劉長佑率勇由東安縣回援新甯函招入營馳約各團刻期同進敗賊於楊溪村是爲該故督臣立功之始六年經前湖南撫臣駱秉章檄飭回籍募勇五百人隨同劉長佑馳援江西甫抵萍鄉縣卽以生力軍攻克蘆溪司要隘進規袁州府探知僞侍衛李能通在賊中最人能得眾心該故督臣募購內綫招令出降推誠待之與李能通盛服並騎繞城大呼其黨降者晝夜不絕僞檢點張逆等宵遁官軍馳入據之論者謂援江之役以袁州爲最要門戶袁州旣下則毗連之臨江吉安瑞州

各郡皆震該故督臣出奇制敵迅復堅城厥功甚偉七年率楚軍前鋒由分宜新喻直趨臨江抵太平墟賊勢方熾遂至羅枋與湘軍及江西水師合圍臨江府城僞翼王石達開率悍黨數十萬來援該故督臣與劉長佑定計趁賊未集三路進擊賊眾驚潰渡河溺死者無算城中之賊大亂潰圍遠遁遂克府城八年前湖南撫臣駱秉章以劉長佑請假回湘檄令該故督臣代統各軍進攻撫州軍次秋溪賊於上游龍古渡夾河爲營該故督臣慮賊堅守撫州之賊出而夾擊我軍腹背受敵遂簡銳卒三千乘夜疾進出賊不意大獲勝仗踏平各壘

又以湘營被圍於上頓渡復調二千人往援與湘營合力奮擊賊勢不支遁往福建收復撫州乘勝攻克建昌江西全境肅清九年僞翼王石達開率大股號百萬出江粵之間犯湖南該故督臣在籍招募新楚義安勇二千屯衡州之龍海塘遏賊來路至永州遇賊前隊擊之大捷移駐祁陽赴援寶慶力解城圍隨同劉長佑追賊至廣西桂林克復柳州府城十年經劉長佑奏調至粵委赴東泉接統各軍維時東南各省軍事方亟粵西僻處邊隅餉項異常支絀該故督臣威惠兼施軍容頓壯各路賊匪相繼乞撫並收斬屢降屢叛者數人上海一

帶次第平定十一年進攻潯州艇匪冒死上竄並以陸
匪數千輔之勢極猖獗我軍船礮皆小該故督臣親赴
江干督戰奮勇直前羣賊奪氣斃匪甚多首逆就獲泝
流而上克復潯州府城布置略定遽聞石達開將由粵
黔交界以竄川楚急率所部馳回柳州扼要邀截行近
融縣賊隊已至石逆以我軍守險併命來爭該故督臣
親率勁騎橫擊之血戰竟日賊乃潰退斬僞官十餘人
搜出僞印甚多積功以按察使記名並蒙恩賞給碩勇
巴圖魯名號旋授廣東按察使同治元年升廣西布政
使奉旨飭令迅赴潯州辦理軍務與僞平潯王黃鼎鳳

迭次鏖戰獲勝黃逆退歸天平寨該故督臣分兵收復
橫州諸境悉平復用奇計攻取覃塘堅壘黃逆窮蹙出
降磔之賊黨一併伏誅廣西藏垢匿瑕之地窮凶極惡
之徒至此蕩滌殆盡黃鼎鳳憑險負固二十餘年前兩
廣督臣勞崇光在粵最久深以爲憂該故督臣竭兩年
之力穩紮穩進攻克堅巢巨欸授首廣西士民至今感
頌此該故督臣歷著之戰功也該故督臣起自寒儒於
地方利弊夙所究心初爲廣東臬司到任未久卽赴廣
西接辦軍務迨同治四年補授江西巡撫乃得專心吏
治首劾貪劣守令十餘員每接見僚屬必舉作秀才時

所見州縣衙門積弊懇切告誡刊發佐治各書令其置
諸座右朝夕省覽裁汰各項陋規籌給瘠缺津貼以養
其廉吏事蒸蒸日上前大學士臣曾國藩稱其居心公
正辦事精明見之奏牘又江西軍興後餉項報銷四千
餘萬各州縣交代積壓九百餘起輾轉輻輳流弊滋多
該故督臣設局澈底清查嚴劾虧空之員並議裁各處
門釐酌減坐賈釐金民困以蘇餘如修圩隄興水利辦
積穀設粥廠添築貢院號舍百廢俱舉復以江省徵收
丁漕向有畫一章程言者欲改定銀數如有不敷另准
加收該故督臣慮有包庇侵漁之弊詳切陳奏力持前

議得旨允行該省至今循守江西本該故督臣立功之地在任十年休養民生澄清吏道一時翕然稱頌迨同治十三年調署兩江士民不忍其去多有依戀感泣者光緒元年補授兩廣總督粵省官場積習過深營務亦多廢弛該故督臣到任後嚴加甄別參劾文武七十餘員並以釐務爲叢弊之藪該故督臣嚴參數員官方肅然嗣兼署粵海關監督卸篆後餘銀二十餘萬兩奏明以十五萬兩解交藩庫優詔嘉獎准其議敘復兩次奏請飭部註銷議敘之案餘款悉以助賑修隄及各項善舉之用未嘗一錢入己五年調任兩江是年秋間琉球

因日本侵併遣使求救議者請三面出舟師東征該故督臣以爲未可輕舉疏陳利害援據古今其議遂止七年開缺回籍十六年復起爲兩江總督十七年春間到任蕪湖等處匪眾焚燒教堂沿江騷動一夕數驚各國議調兵艦入江勢甚岌岌該故督臣相機因應調撥兵隊分往保護緝獲首要各犯立置重典旬日之間民情大定教案亦得從容議結復以各處伏莽未靖會匪甚多必須捕治黨魁方能設法解散適鎮江查獲美生私運軍火並在安慶拏獲匪首李顯謀審明懲辦匪謀始戢十數年來籌辦江防沿江礮臺後膛者多係雜式舊

礮間有較新大礮則仍係前膛不能適用該故督臣飭上海製造局仿造英國大鋼礮及快礮多尊創造吳淞口附近獅子林礮臺一處皆設新造大礮其餘江陰等處各臺亦量爲添設沿江礮臺有新造後膛大礮自該故督臣任內始二十年中東事起奉命赴山海關督師款議定後仍回兩江本任二十四年冬渦陽土匪滋事聚集二萬餘人縣城被圍該處爲捻匪老巢一經分竄將有燎原之禍該故督臣電商安徽河南撫臣三路進兵協力兜勦一鼓盪平奉旨優敘二十六年近畿拳匪之變該故督臣維持東南大局苦心孤詣堅定不搖業

蒙天語褒美無俟臣之贅陳是年七月富有票匪在長江裕溪口張貼逆首康有爲偽示煽惑愚民勾結會匪搶去礮船軍裝藥彈竄擾大通毀劫鹽局釐局遠近震動該故督臣迅派開濟兵輪載衡字營勇駛往會合安徽防營勦辦彈壓該匪逆謀因之不得遽逞人心大安厥後力爭東三省條約會商各國商約皆能統籌國家利害極力堅持有裨大局此該故督臣之政蹟也臣查該故督臣劉坤一天性忠摯器量寬宏厯官封圻幾四十年吏事最爲老練見事最爲敏速平日接下以和撫民以惠不爲稜角峭厲之行而每遇有危疑明決應機

不爲眾論所淆惑古人所稱能斷大事洵無愧色其辦理外交開誠布公和平而又堅定十年以來上海地方屢有橫生枝節皆以鎮靜堅持處之絕不爲所搖動久之卒就帖服近年力保長江之約各國尤所稱佩身歿之日各國領事兵官先後來甯弔奠送殯並下旗誌悼江南士民於此舉尤爲感頌不忘誠如聖諭可謂國家柱石之臣矣該故督臣歷任兩江最久近年疆事日棘臣在湖廣總督本任內江楚接境聯屬合辦之事甚多故於其經畫大端知之尤詳該故督臣處事既有定見聽言又能虛心臣每遇有要事與之商榷從善如流不

存成見尤爲人所難及謹將其生平居官事蹟遵旨臚陳仰請宣付史館立傳以彰盡績

硃批著照所請該衙門知道欽此

特參管帶練船參將摺

光緒二十九年二月初二日

竊照寰泰兵輪前經改爲練船專爲教練水師學堂學生而設查刊本南洋水師練船章程內開該船共設教習四員練船正教習卽以管駕官兼充一切應知應能之事號召部署攻戰守禦之法駕駛積算御風應變之術皆歸課習其槍礮帆纜測量三教習所授各項功課仍統歸管駕官督同酌定隨時稽查具報水師學堂查

考其學生上練船之後應令先習帆纜兩三月俟其漸熟再行駛出洋面練習風濤定限三年周歷各海洋各口岸各將經緯度數沙綫礁淺山海形勢各國礮臺兵輪操法詳登日記並分晰繪圖每七日送管駕官校勘一次俟畢業回甯大考時彙送查核又載學生上船後由管帶官認真管束督率課練如無實效卽將管帶官議處各等語是管帶官責任綦重應如何認真辦理乃此次練船學生畢業經臣親往校閱令其演放大礮手法生疎草率拉火不響遂不再安拉火空手作一拉之勢而已令其裝配藥彈演試礮準則管帶甚有難色據

云數年來罕有裝藥實放十分可駭令其演行船撞船諸事則只空比手法船身並不運動種種直同兒戲令演帆纜功課則云舊日帆纜壞爛稟請添製未准遂未演習索閱其出洋海圖則三年內僅寥寥數紙至於體操則甚屬草率軍裝則不遵帶號帽司道將領隨同在船觀看者無不譁笑而管帶教習亦靦然不以爲怪詢問所歷海洋則僅到過朝鮮一次三年之中並中國所轄海面之瓊州欽州及日本西貢最近之海洋亦不能到似此各項功課實際毫無不知該學生等所練何事所畢何業管帶袁泰練船福建補用參將何心川平日

並不遵章教督課練虛糜經費曠廢歲月貽誤水師人才實堪痛恨除此次學生不准作爲畢業及另派管帶寶泰練船并將練船教習撤差示儆外相應請旨將福建補用參將何心川卽行革職以爲將來管帶兵船練船各官及堂內學生不講求操練者戒

硃批另有旨欽此

查明許應騤參款摺

光緒二十九年二月十三日

竊臣承准軍機大臣字寄光緒二十八年十二月初六日奉上諭有人奏參閩浙總督許應騤貪污卑鄙各款請旨飭查一摺著張之洞按照所參各節確切查明據

實具奏毋稍徇隱原摺著鈔給閱看將此諭令知之欽此查原奏情節重大當卽欽遵遴委江安督糧道胡延江蘇候補道郭道直馳往福建省城按照原參各款密切訪查詳慎考證據實稟覆核辦茲據該道等會同調查案據兼以采訪輿論互相參考查明稟覆前來復經臣飭傳該道等詳切面詢覆加考察按照原參各款確查實在情形敬爲 皇太后 皇上分晰陳之一原奏所稱光緒二十七年六月萬壽聖節該督已正始謁萬壽宮行禮爲前福州將軍景星所譏該督拍案詬詈幾至鬪毆一節查是年六月萬壽聖節慶賀該督臣許應

駢到班尙早並未遲至己正其與景星爭辯係在朝房更衣之後因船政應撥海關款項該督臣在兼署將軍任內人未撥解景星到任該督臣移請撥解彼此爭論互相譙訶至於拍案尙無詬詈幾至鬪毆之事一原奏所稱庚子福州大水該督深居不出反召優伶連日劇飲紳士稟請給照買米又靳弗與專給其同鄉義和行買辦吳鑄亭采買該督之弟許應璜與吳鑄亭合夥營商日在南臺招權納賄本年十月倒欠二十餘萬被其弟先期私運回里一節查庚子年福州水災經司局詳請奏開賑捐辦理賑撫一年之久尙非玩視民瘼訪聞

該督臣是時亦未召優劇飲領照買米不止一人吳鑄
亭亦僅承辦一次查許應璜係許應騭族弟該督臣到
任時自粵來閩省視因吳鑄亭係屬同鄉向有來往尙
無合夥營商招權納賄之事現在許應璜業已回粵吳
鑄亭經手義和行事倒欠商款實祇二萬餘兩並無二
十萬之多事與許應璜無涉並無先期私運回里情事
一原奏所稱該督於文職信用臬司楊文鼎道員孫道
仁武職信用總兵鍾紫雲三人狼狽爲奸文武多出其
門屬員習爲奔競政以賄成一節查臬司楊文鼎在鹽
道任內卽總理捐局現又總辦武備學堂該督臣因其

才堪任事一切要政多與商榷道員孫道仁統帶福勝軍又會辦武備學堂總兵鍾紫雲統帶福強軍皆爲該督臣所信任至以巨金結納及具贄拜門等事查無確據一原奏所稱文職買差買缺多由楊文鼎孫道仁經手武職多由鍾紫雲經手最著者如知縣吳兆璜買署詔安王國瑞買署建甯仙遊崇安捐升知府蔣唐祐在晉和被控買署莆田知縣朱開泰買署連江章景楓買署晉江楊文鼎復假手於官運課釐局提調鹽大使宋尊望爲之居間說項得贓分肥宋尊望將局中間款搜括與楊文鼎均分創設銅元局公款半歸私飽各節查

前署詔安縣知縣呂兆璜並非吳兆璜其在莆田縣署任內被控納本縣舉人楊中楷婢女爲妾飭據呂兆璜供稱納妾屬實但在交卸莆田之後現在呂兆璜楊中楷均已病故王國瑞卸署仙遊後酌委崇安並未委署建甯各任內均無被控之事蔣唐祐前署政和縣並非晉和在任被廩生宋士英上控侵吞膏火浮收寺捐據建甯府委員查明尙無其事宋士英等捏詞越控由府詳革又在莆田署任被附生劉玉麟臚列八款上控臬司楊文鼎以事不干己立案不行嗣據興化府知府玉貴詳請將劉玉麟等五名斥革經該督臣批准復行府

提案根究主唆之人蔣唐祐被控各款令其自行稟復嗣有縣民與蔣唐祐爲難糾眾赴署滋鬧并將其勇丁轎夫毆傷蔣唐祐因公晉省藩司周蓮因其人地不宜檄飭留省當差至知縣朱開泰委署連江章景楓委署晉江均係酌委雖謠詠紛騰尙無賄賂營謀確據惟調閱各縣控案凡地方生員一經上省控官卽褫衣頂無一免者最甚者莫如蔣唐祐莆田一案臚列劣迹八款之多自應飭本管道府查復乃不問虛實遽將原控五生斥革又復批府提案嚴究以致纍纍青衿株連羈押而蔣唐祐被控入款僅令自行稟覆查閱蔣唐祐覆稟

滿紙矜夸負氣之言恃寵而驕聲情如繪不知此等劣員何以深信不疑始終信任查此案初控省之時藩司周蓮係批府確查而臬司楊文鼎逕行批革嗣後蔣唐祐署事期滿本管知府玉貴稟請留署周蓮深知其入地不宜委員接署其眷屬回省復經該府會營派兵護送袒庇若此查蔣唐祐得罪縣民至辱其輿從眷口回省又慮及百姓阻鬧其爲眾惡所歸不獨四五紳士與之爲難亦可想見至鹽大使宋尊望向在官運局課釐局當差爲楊文鼎所信任承辦各捐假公營私專好結納惟謂其居間得贓分肥則查無實據官運課釐兩局

亦據鹽道鹿學良查復並無閒款又查閩省銅元局係光緒二十六年附於銀元局開鑄係楊文鼎經理銅本係局中自行籌墊並未請領官款嗣因行銷甚廣添廠購機自二十八年五月起每日可鑄五百千上下機廠銅本均向商家挪借共用成本四萬七千餘兩每月除去局用約獲餘利二千金陸續歸還借款俟借款還清卽將餘利撥歸公用因事係外辦未支正款尙未報部原參謂公款半歸私飽亦屬傳聞之誤至謂文武買差買缺皆由楊文鼎孫道仁鍾紫雲三人經手無從得其實據一原奏所稱孫道仁一紬袴子目不識丁以鑽營

諂媚得各優差於所統福勝軍及衛隊親軍一切委之教習崔祥奎紊亂營規剋扣軍餉孫道仁受其挾制且爲掄揚其鍾紫雲復與督中協副將賴文華結拜兄弟每遇提標將備各缺無不廣收賄賂各節查孫道仁係前提督孫開華之子亦通文理尙不至目不識丁且小有肆應之才惟該員年輕資淺既無學問又無閱歷省城福勝軍勇丁十旗及衛隊親軍一營全歸該道一人統領此外兼差尙多聲勢烜赫其逢迎結納朋比營求頗不理於眾口至謂一切軍政委之教習崔祥奎查崔祥奎現係試用知府從前係北洋武備學堂學生出身

該員既以操練事務相委自必爲之掄揚似無不合所
統福勝各營旗勇丁半係湘楚人半係本地人孫道仁
係湖南人聞其待本地人最刻初入營時不補正勇必
俟練熟槍礮再三求補口糧尙是減半惟並無告發之
案傳聞該營勇丁向有缺額孫道仁聞知江南委員到
閩趕卽招補足額是以無從查考鍾紫雲以實缺福甯
鎮總兵駐守長門爲該督臣所倚任訪諸與論尙無缺
額吞餉及廣收賄賂情事惟聞該員於該督臣諂奉殷
勤不免過當查無公然餽獻實據其與督標中軍副將
賴文華結拜兄弟屬實此乃軍營同官結交常情尙無

不合至與賴文華互相推挽揄揚則實有其事一原奏
所稱二十六年七八月間聖駕西巡萬眾感憤該督晝
夜酣嬉當憂而樂鍾紫雲孫道仁所統各軍攤派餉銀
競紮龍燈向督署戲耍該督日吸洋煙一百二十口優
人名紫雲者鍾紫雲進之該督該伶終日女妝出入督
署各節查庚子年七八月間福州方有水灾官紳籌辦
賑撫均無暇逸樂亦無東洋影戲次年正月各營兵自
紮龍燈但未攤派餉銀該督臣從不吸食洋煙人所共
知省城優伶有名紫紅者年齒已衰查無出入督署之
事一原奏所稱該督七十壽辰黃白雜進私橐已盈二

十五年二月該督爲其先人作百年冥壽候補道何成
浩進珠如意兩柄鍾紫雲獻八千金爲燒箔之用前藩
司李興銳僅送呢幃至爲門丁所擲嗣是遇散壽屬員
爭餽厚禮三百里内外文武躬詣稱祝無敢後者各節
查光緒二十五年該督臣七十賜壽張筵款客祝者較
多不免收受禮物候補道何成浩並無進珠如意兩柄
之事惟聞有人送玉如意者其價甚昂致與售主議價
爭鬧但不能得其主名至冥壽資福是其鄉風所送禮
物多紙紮聯幃之類藩司李興銳於該督臣生日送呢
幃一懸門丁索門包二十四元李興銳不與將呢幃收

回該督臣聞之切責門丁李興銳仍以幃進至鍾紫雲
獻八千金則查無確據一原奏所稱閩省捐局向綜於
藩司該督憚前藩司張曾敷之守正改派鹽道楊文鼎
爲總辦後署臬司局務隨之現任藩司周蓮拱手受成
一節查閩省捐局楊文鼎前委總辦捐局前任藩司張
曾敷現任藩司周蓮雖先後充該局督辦其事實歸楊
文鼎一人主持查藩司政務殷繁日不暇給即使藩司
爲守兼優亦未必無所不知無所不能各省局務司道
雖一同列銜往往專派司道一員或候補道一員主稿
量能分任以爲藩司之協助至籌捐等事自有專長除

官缺田賦軍餉三大端外原不必事事皆責之藩司一人只論其有無弊端不在以何員爲總辦藩司如查出弊端儘可據實稟揭楊文鼎於捐事最爲精明熟悉且係實缺臬司鹽道總辦捐局並無不合一原奏所稱庚子水災紳士陳寶琛曾宗彥等在省城東街平糶止用銀四萬餘元而常平報銷至八十四萬有奇外省外埠捐銀尙不在內一節查閩省向無賑捐局光緒二十六年六月水災係由善後局辦理急賑歸前藩司張曾敫主政八月奏准開捐始設賑捐專局善後局辦賑墊款均移歸賑捐策銷紳士陳寶琛等在東街平糶並未報

明賑局究竟買米及用款若干局中無案可稽庚子水
災並未動放倉穀賑局官辦平糶係常川開設共有五
廠照原購之值減價出售截至次年七月止設廠既多
歷時又久用款自較紳辦爲巨計水災案內共用銀六
十四萬九千三百餘兩詳經奏報係連平放賑辦工開
河等項一并在內其平糶一項亦祇報銷銀十六萬一
千五百餘兩實無八十四萬之多賑局所收外省外埠
捐款銀四十四萬二千餘兩亦經奏明有案原參所指
各款係將工賑各項併爲平糶之用故覺其多現經逐
款查明尙無別項情弊一原奏所稱防捐派全省八十

萬八月截止已多贏餘而九月仍有收捐之事款目至一百二十餘萬奏請截留實則肥已大半在楊文鼎之手寄放源豐潤兌局生息其所開銷多係浮報一節查閩省前因籌辦海防奏准截留海防捐款備用光緒二十七年正月設局開辦飭委周蓮督辦楊文鼎總辦派員分赴各省及南洋各埠勸辦本省責成府縣收辦本未限定收數七月二十九日奉旨停捐卽經電咨行在戶部將遵旨截止日期報明八月二十九日捐冊依限一律造齊先後七批共收正項及部飯照費共銀一百十九萬五千兩有奇有案可查至停捐時各處捐冊雖

依期造送所收捐款斷不能同時解齊卽本省汀邵等府多有遲至隔年始行解到外省外洋報解更難迅速原參九月仍有收捐之事或係因此誤會此項捐款奏明專辦海防之用先後撥充勇餉及修造礮臺廠屋訂購機器軍械等項銀共銀一百四萬六千餘兩現實存銀十四萬八百八十餘兩並未提充別項公用至源豐潤兌局本省將軍司道各庫及善後局凡有零星收款向存該號撥兌不自楊文鼎始調查該號帳簿均係時存時放尙無生息之事至賑捐鉅款及各署正款均未存放商號遍訪均無異詞一原奏所稱武備學堂關繫

綦重臬司楊文鼎因其妾不容於嫡鎖禁空園求計孫道仁令通判閔毓靖與鹽大使宋尊望乘夜挖開鹽道署後牆將所禁之妾移居於武備學堂孫道仁亦將其妾遷入學堂且乘大閱之時轎後隨帶女眷十餘口至營看操玩視戎行而楊文鼎更不時於署中聚賭集孫道仁何成浩鍾紫雲等互相角勝臬司公事一任刑幕陳濟洧舞弊本年楊文鼎五十生日大收禮物各節查閩省武備學堂規模宏敞係就裁缺巡撫衙門改建楊文鼎孫道仁實總其事學堂房舍甚多孫道仁及提調各員均攜眷住堂但分門別戶不與學生教習相混楊

文鼎在鹽道任內有妾生子其妻非理禁錮楊文鼎乘夜將妾移出寄居孫道仁寓所訪查官民並無求計挖牆等事通判閔毓靖鹽大使宋尊望曾否與聞其事無從查悉惟閔毓靖乖張卑鄙遇事生風宋尊望劣蹟多端均爲楊文鼎孫道仁所信任工於趨奉大閱之日楊文鼎孫道仁女眷俱乘輿往觀其時傾城士女皆往看操不獨此兩家眷屬此事無關吏議至楊文鼎辦事敏捷每日午前卽將公事了清案無留牘往往招集鍾紫雲孫道仁等及富商數人聚談留飯賓客過雜事誠有之雖傳聞有偶爾鬪牌之時實無憑據更無公然開賭

之事臬幕陳濟洵人尙謹飭並無舞弊情事本年楊文鼎五十生日張筵演戲數日間間有收受禮物之事查楊文鼎辦事有才該督臣任之太專通省要政多責之該臬司一人權勢既重因而恃才驕蹇任意指揮以致同官側目一原奏所稱閩中小銀元舊係孫姓承辦因銀色止有七成市間不能通行後改歸官辦其不通行與孫姓相等該督乃用楊文鼎之策勒令各府州縣典鋪錢莊以大易小移害於人至錢法則銅三鉛七名爲烏鉛錢民不肯用亦以官示勒之至納稅完糧均不得用一節查閩省小銀元前由紳士孫葆璽承辦銀色在

七成左右不能通行嗣因孫葆璫虧累改歸官鑄銀色相等省城發給軍餉薪糧每銀百兩折發大銀元七成小銀元三成民間繳解錢糧每百兩繳紋銀五十兩大銀元四十小銀元一十原參以大易小蓋卽指此省城內外現行烏鉛錢質地薄劣民不肯用此錢並非官鑄亦未以官示勒之現在銀元局已停鑄銀元專鑄銅元行銷甚暢於官民皆有裨益一原奏所稱坐賈抽捐事非得已本年四月仙遊滋事該邑地方本小署任王士駿句結紳士設局勒派民不堪命致將經手辦捐之紳董書差房屋拆毀王士駿以民變通稟該督不問原由

輒派候補道柯欣榮會同興化府玉貴帶開花駁馳往
勦滅無數鄉村戮及無辜婦孺乃捏報拒捕格殺二十
餘名完案尤可怪者責令鄉民攤賠兵費一萬八千餘
元一節查此案情節重大派員密訪查得閩省派償洋
款經司局議辦隨糧捐房捐鋪戶捐三項內鋪捐仿照
坐賈辦理又謂之坐賈捐按照貨物價值每銀一兩抽
銀三分每錢一千抽捐三十署仙遊縣知縣王士駿慮
及捐數不足商之紳董鄭元凱黃紀通紀有堂吳仁英
等該紳董迎合縣意設法蒐羅凡土產之貨不由鋪戶
買賣者亦一律起捐甚至加倍在縣城郭家祠開局抽

收民間嘖有煩言縣南傳圍鄉民情素悍糾集隣鄉二
三千人於五月初六日進城向縣署喧鬧王士駿諭禁
不止因言加捐乃紳董所爲并開姓名單付之鄉民一
擁出署奔至紳董鄭黃紀吳四家及庫書林允升房屋
并捐局全行拆毀初七日又復進城滋鬧適莆田聞警
派勇踵至鄉民畏懼逃出西門拆毀糧書劉保房屋而
散王士駿通稟請兵該督臣飭派候補道柯欣榮參將
江孝全帶兵數百名馳抵仙遊時興化府知府玉貴未
到王士駿與柯欣榮等連日遣人往鄉探路實欲各鄉
轉圍不意其人均被窘辱而同二十九日柯欣榮在城

未出營縣分帶兵役突至白塔霞苑兩村拏獲數十人
折至傳圍村鄉民鳴槍持械扼要拒守乃開礮轟擊至
斃鄉民十餘名殺死四名震死女孩四名眾民紛紛逃
匿兵隊乘勢搜捕焚燒民房九十餘家傳如璋所開聚
成典鋪及油坊住屋悉歸一炬鄉民傳棕轟斃倒地認
係爲首之人將其頭割下帶城示眾又有鄰鄉愚民陳
玉鄭泳陳起春張堂四名跟定王士駿之轎喧鬧狀類
風狂帶回縣署處以斬決知府玉貴事後始到誤傳鄉
民將圖報復城廂畏累罷市玉貴躬自勸導始貿易如
常至攤賠各費皆出自曾隨傳圍鄉進城鬧事之鄉村

聞半山村出洋六千元青山村出洋四千元白塔霞苑等村出洋多少不一皆散給被拆房屋各紳吏之家調查案據該督臣原奏與所訪情形不盡相同如滋事實由派捐而原奏謂匪徒以祈雨爲名無故焚毀釐卡鹽館至擊斃人數亦不相符其縣城斬決四名係王士駿審係滋事抗捐之犯由該督臣批令就地正法又該督臣原奏稱王士駿本係閩省老吏夙著賢能此次變起倉猝竭力防禦捐輸亦係照章並無不合等語查王士駿素負能名辦事操切上年賠款派捐各省同時舉辦卽謂閩省民風强悍何以滋事止有仙遊一縣且該縣

鋪捐既照坐賈章程何以土產之貨不由鋪戶買賣者亦牽連收捐是滋事實由該縣所致迨百姓入署喧鬧該縣又委之紳董嫁禍於人拆毀捐局紳屋之後不思設法解散輒行電稟請兵以致各鄉民鋌而走險斃斃二十餘名之多當時擊斃之人或猶可諉之曰拒捕格殺至跟轎喧鬧之愚民既經帶回城內即使亦係隨同抗捐之人亦不宜概加重典何至又復誅戮四人復焚毀鄉村典鋪油坊九十餘家事後又派償紳董房屋費各數千元仙遊民生之困民氣之傷亦已甚矣一原奏所稱統領駐在長門提督居於泉郡水路隔遠勢難兼

顧該督以鍾紫雲兼之汀漳龍道缺出何成浩回籍未返該督懸缺以待急電促之各節查鍾紫雲係實缺福甯鎮總兵派統福強各軍駐守長門素爲該督臣所信任委署提督長門距泉州過遠誠有不宜惟現在早已交卸署篆候補道何成浩前派赴廣東各埠勸捐甚爲出力回省之日委署汀漳龍道並非補授惟查何成浩人尙謹慎署理汀漳龍道爲日甚暫任內亦無劣蹟可指一原奏所稱該督之子江蘇候補道許秉璋及其壻委充洋務局銀元局提調補用知府彭思桂皆倚勢招搖聲名甚劣一節查許秉璋以道員指分江蘇尙未到

省隨任閩省並不出外應酬分省補用知府彭思桂查
係該督臣姪婿例不迴避該員諳習洋語是以派充洋
務局提調兼銀元局差使與許秉璋均無倚勢招搖情
事一原奏所稱家丁楊升尤爲該督所昵龍溪鹽商林
姓一案索賄二萬餘金贓已入手嗣因幕賓批駁之處
改爲批准事經告發該督不得已將楊升交縣詞連署
內子弟委員不敢窮詰案懸至今論者謂該督實受賕
款諉諸楊升一節查楊升爲督署家丁派管外書房文
件光緒二十六年十月楊升與在逃素識之徐景雲閒
談稱有龍溪鹽商林泰稟請接辦鹽務託楊升設法批

准楊升貪利允從將未准批語改爲應准接辦並描摹該督臣及幕友圖章雕刻蓋用朦混鈐印發行當由徐景雲交給楊升票錢三千三百串旋經該督臣覺察將楊升及承稿經書林振綱等發府訊辦奏明檢舉在案現在楊升已經福州府訊取確供按律擬定絞監候罪名詳辦該犯前後供詞並未牽連署中子弟官眷此案該督臣並未稍事迴護原參所云自係傳聞之誤以上各節據委查道員胡延郭道直分條查訪尙屬詳悉臣覆加查核此案原參閩浙督臣許應騷貪污卑鄙受賄營私各款均無實據惟身任封圻受恩深重當此時事

艱難宵旰憂勞之日不能憂勤儉約正已率下虛心求
治固結民心生日多收禮物家丁勒索門包人言嘖嘖
不爲無因其於蔣唐祐莆田一案原控臚列劣蹟至八
款之多並不飭查輒將原告五生盡行褫革批府嚴究
於王士駿仙遊一案信其朦稟不責其派捐生事遽准
發兵致令激成巨衅慘斃多命礮斃震斃之外又復將
隨轎喧鬧者帶回城內正法四人此等殘暴之員不加
譴責復爲奏請免議民心尤多不服據該道等訪諸輿
論皆謂該督臣資老年高不免自負大率好諂而惡直
是官而非民此其用人行政不能允協之病根至於通

省政事行止人才進退從無周諮博訪之時文事文職
惟專聽楊文鼎孫道仁兩員之言武事武職惟專聽鍾
紫雲賴文華兩員之言而此數人又爲通省官民之所
詬病然則無論有無他項私弊其爲用人太徧下情壅
蔽以致輿論不孚臣實不能曲爲該督臣諱臣欽遵諭
旨不敢稍存徇隱案關封疆大吏謹據實奏聞伏候聖
裁福建按察使楊文鼎恃才傲物多攬權利豪縱娛樂
喜人應酬徇屬員輕革諸生於上控各案動輒批駁
不恤民隱實非掌刑獄司風憲之官所宜至於親狎雜
賓爲人所輕治家無法貽人訕笑尙屬小節惟查該員

才具素長吏事幹練治事精敏案無留牘尤長於辦捐
籌餉確係辦事能員此時若蒙聖恩量加儆戒示以裁
抑令其恪就準繩他日尙係有用之才正朝廷成就該
員之德意惟臬司實未能勝任相應請旨將楊文鼎以
道員降補以觀後效福甯鎮總兵鍾紫雲早年統兵尙
好此時物議滋多但查無賣差賣缺吞餉受賄實據惟
以提鎮大員專以逢迎奔競朋比交結爲事其營伍自
不能核實整頓勢所必然實屬有忝專閫之職應請旨
將鍾紫雲開去福甯鎮總兵之缺留於閩省差委以策
將來福建督標中軍副將賴文華外樸內狡工於趨附

且多汲引私人應請旨將賴文華以守備降補福建補用道孫道仁年少熱中營求好利爲通省各官之倡敗壞風氣有忝家聲所統各營於本地勇丁缺額扣餉亦難保其必無論其品行事蹟本應褫革惟該員平日尙知練兵爲今日急務其資性聰穎承辦武備學堂頗肯講求所統各營雖不能精通西操事事合法然該員肯親身帶隊操練尙有皮毛較之各省統領文武大員一味頑固驕惰全不肯仿照西式操練者實已加人一等臣數年來於練兵一事稍知甘苦似此有志講求新法操練之員閩省恐不易覩似不能不加以節取且該員

係立功宿將孫開華之子可否仰懇格外天恩將孫道仁以通判降補仍留福建撤去善後局及福勝軍衛隊親軍統領暨他項差事令其專充武備學堂總辦并充督操營務處責令戴罪圖功務令將閩省勇營訓練實有成效以贖前愆俟三年後朝廷派員赴閩閱看如閩省各軍操練不精弊端未去卽由閩浙督臣從嚴參辦永不敘用福建試用通判閔毓靖鑽營生事候補鹽大使宋尊望貪鄙嗜利應請旨均卽行革職捐升知府前署莆田縣知縣蔣唐祐卑鄙妄爲劣跡多端輿情怨憤應請旨革職永不敘用署仙遊縣知縣王士駿派捐苛

刻激成事變率行請兵下鄉先後擊斃斬殺鄉民二十餘命并毀鄉村鋪戶實屬苛暴殘忍統帶祥勝營參將江孝全督兵彈壓不能相機開導威惠兼施勒繳首犯遽行開礮轟斃多命候補道柯欣榮雖未下鄉惟不能籌商妥辦亦有不合相應請旨將王士駿革職永不敘用並發往軍臺效力贖罪江孝全卽行革職柯欣榮交部議處以爲草菅民命者戒至江蘇候補道許秉璋福建候補道何成浩分省補用知府彭思桂知縣王國瑞朱開泰章景楓臬幕陳濟洧等均查無劣蹟知縣呂兆璜業已病故許應璜早經離閩應均請免其置議再學

堂爲教育人才之地學生眾多理宜清肅豈容總辦提調等員寄頓眷屬況在武備尤不相宜應請旨敕下閩浙總督嚴飭楊文鼎孫道仁等速將眷口遷出學堂嗣後無論何官均不准攜眷住堂以肅學規而重武備殊批另有旨欽此

創設官錢局摺

光緒二十九年二月十三日

竊照江蘇地方近年制錢異常短絀錢價日昂商民交困大江南北情形皆同雖經前督臣劉坤一於上年六月間奏准在金陵銀元局增鑄銅元而民庶用繁銅元一端仍未足供全省之用體察情形惟有行用官錢票

以濟現錢之窮且必須廣鑄銅元以應官錢票之取庶
可互相維持臣等往復電商辦法應於江甯蘇州兩省
均設立官銀錢局同時并舉力量較厚補益較多以常
理論之甯屬蘇屬本爲一省旣行官錢票自宜彼此交
兌互收一氣貫通不分界限庶足便商旅而廣流通卽
如民間銀號錢莊亦必各處多設分行共一總號隨處
可以取錢可以匯兌氣勢方寬惟創辦之初或須有因
地制宜之處祇可暫爲各用各票俾端緒較清稽核較
易當飭甯蘇兩藩司將應行籌畫事宜會商詳辦茲據
江甯布政使李有棻蘇州布政使陸元鼎會詳稱擬各

就省城創設官銀錢局一所在甯曰裕甯官銀錢局在蘇曰裕蘇官銀錢局繕繪官錢票樣分註局名擬請咨由出使日本大臣轉託日本大藏省印刷局精製票板刷印票紙每票一張作制錢一千文准其完納本省關稅鹽課釐金及一切公款與現錢無異江甯省城已由江甯藩司籌款添購銅元機器擴充廠屋廣爲鑄造前於正月內奏明在案蘇州省城現已由蘇州藩司籌款創設銅元局購機趕辦另摺奏明除儲備制錢待用外尤須多存官鑄銅元作爲票本凡持票赴局兌取現錢者每票或取制錢一千文或取銅元一百元悉聽民便

甯蘇兩局之票板式樣一律相同惟局名及蓋用兩藩司印信各別暫時各用各票俟甯蘇本屬流通大信昭著再行互相兌用以期脈絡貫通合而爲一等情具詳請奏前來臣等查中國民間日用向以錢爲大宗錢缺價昂商民皆病其最苦累者以三項爲尤甚兵勇之領餉以銀數計錢過貴則餉項明不減而暗減商賈之完釐捐以錢數計錢過貴則釐捐名不加而實加至於鹽務爲尤甚運商行銷外省以銀數計運商訂場商之鹽場商收竈戶之鹽皆以錢數計錢價過貴則運商贏不補虧勢將停運尤於大局有關至於銀價日低則定貨疑

沮百貨壅滯行旅苦累一切商務民生均多窒礙惟行
用官錢票以代現錢又多鑄銅元以輔錢票官票銅元
兩皆充裕由官酌盈劑虛權其收放則可以損其過而
常持其平惟官票必須官收示民以信斯爲行票之根
本官票旣暢錢價自平民困自紓實爲今日利國便民
之急務現已咨會出使日本國大臣蔡鈞轉託日本印
刷局按照所寄票式代爲製印約計七八箇月可以造
成寄回應用現飭甯蘇兩藩司兩局此時各用各票以
後體察情形如可以交兌互收再行定數立限劃付結
算設法防弊以廣流通其一切未盡事宜迅卽妥籌舉

辦並通飭全省州縣關局凡遇商民持票呈繳官項者與現錢一體兌收不准稍有留難需索及補色補串等弊違者嚴行參處

硃批著照所請戶部知道欽此

選派水陸師學堂學生出洋肄業片

光緒二十九年二月十三日

再光緒二十八年九月初四日欽奉上諭朕欽奉慈禧端佑康頤昭豫莊誠壽恭欽獻崇熙皇太后懿旨前經降旨飭令各省調派學生出洋遊學以資造就聞近來遊學日本者尙不乏人泰西各國或以道遠費多資送甚少亟應廣開風氣著各省督撫選擇明通端正之

學生籌給經費派往西洋各國講求專門學業務期成就真才以備任使將此通諭知之欽此欽遵在案伏查中國所最缺少者莫如水陸師將校之才水師以英國爲最著陸師以德國爲最優惟是遊學西洋道遠費重語言文字扞格難通非先於西文略窺門徑而又於中學稍具根基者就學殊難獲益茲於江南省城水師學堂選取畢業學生曾習英文者八人派往英國水師學堂以四人專習管輪之學以四人專習駕駛之學每年約需經費銀二萬餘兩在於通州紗廠官本生息奏定存備出洋遊學經費項下如數動撥又於陸師學堂選

取畢業學生曾習德文者八人派往德國陸師學堂分
習步騎礮工各門學問每年約需經費銀二萬兩在於
司庫籌備要政經費各款項下如數動撥其往返川資
治裝各項統由司於要政經費項下湊足各學生均屬
青年有志資性可造之才經臣諄切訓勉到外國後務
須立品端重不忘君國勤求實學交結正人期於學成
回國各有專長以備任使此次派往暫以三年爲限至
三年滿後應否卽令回華抑或再令留學以期大成之
處應俟屆時體察中國需用緩急情形學生志業再行
斟酌辦理

硃批外務部知道欽此

張文襄公全集卷五十九終

新城王樹森校